

Inzko i Kelly izrazili žaljenje zbog pritiska na slobodu medija



Tokom sastanka u Sarajevu, visoki predstavnik i specijalni predstavnik EU Valentin Inzko i američki ambasador pri OSCE-u Ian Kelly izrazili su žaljenje zbog sve većih pritiska na slobodu medija u Bosni i Hercegovini.

«Tokom proteklih sedmica vidjeli smo pokušaje da se ograniči sposobnost medija da slobodno, tačno i potpuno izvještavaju iz svih dijelova zemlje. Posebno su alarmantna nastojanja, predvođena izvršnim organima vlasti, da pojedinim medijima uskrate pristup informacijama ili da utječu na njihovu uređivačku politiku», rekao je Inzko. Naglašavajući da je takvo ponašanje neprihvatljivo u demokratskom društvu koje teži da se pridruži Evropskoj uniji, Inzko je izvijestio američkog ambasadora da je uputio pismo predstavnici OSCE-a za slobodu medija upoznavši je s ovim zabrinjavajućim razvojem situacije.

Komentirajući predstojeću predizbornu kampanju, Inzko i Kelly su apelirali na političke stranke da se suzdrže od korištenja nacionalističke retorike koja je dominirala prošlom predizbornom kampanjom. Oni su se složili da značajna odgovornost leži i na građanima koji trebaju osigurati da se političari bave pitanjima koja su najznačajnija za glasačko tijelo. «Izabrani zvaničnici donose odluke koje utječu na svakodnevni život građana i oni moraju znati da će ih građani smatrati odgovornim za aktivnosti koje poduzimaju. Zato je važno da tokom predizborne kampanje što veći broj građana

političkim kandidatima postavi pitanja koja ih istinski opterećuju i da ove jeseni izađu na izbore», rekao je Inzko.